


TEZAUUR LITURGIC
5 NOIEMBRIE

ACATISTUL
SF. IERARH
IONA,
ARHIEPISCOPUL
NOVGORODULUI



MOSCOVA, 2000



Акафист

Святитель Иона, архиепископ Новгородский

Кондак 1

Избранный угодниче Христов и дивный
благочестия подвижниче, веры Православныя
поборниче, от Всемогущего Творца венцем
нетленным и даром чудотворения увенчанный,
святителю отче Ионе, многих ко Христу и
правде Его приведый, обрати и наша сердца ко
Господу Иисусу, песньми духовными велегласно
восхваляем тя. Ты же, яко имеяй дерзновение ко
Прославльшему тя Господу, даровавшему в тебе
нам великаго молитвенника и скорого в бедах
помощника, молися о нас Всемилоствивому
Спасу, да зовем ти:
Радуйся, святителю Ионо, теплый молитвенниче,
о душах наших!

Икос 1

Ангелов собеседниче и человеков наставниче
воистину явился еси, святителю Ионо,
благоволением всех Творца Христа Бога нашего,
Ему же усердно послужил еси от начала жития
твоего, яко чистоту души и тела возлюбив и
Христу любовь усердно последовав,

совершенства духовнаго достигл еси. Ныне же престолу Вседержителя со всеми святыми предстоиши, отраду и вспоможение даруеши всем , с верою и любовью вопиющим Ти сице: Радуйся, во благоухании святыни присно почивающий;
Радуйся, в неизреченной славе Творца мира созерцающий;
Радуйся, всех приходящих к тебе благодатию озаряющий;
Радуйся, от заблуждений духовных нас исцеляющий;
Радуйся, любити Бога и волю Его творити нас научающий;
Радуйся, в добродетели терпения нас утверждающий;
Радуйся, огнем молитвы твоея стрелы вражия попяляющий;
Радуйся, беды и печали от чтущих тя отгоняющий;
Радуйся, святителю Ионо, теплый молитвенниче о душах наших!

Кондак 2

Видевшее благочестивая вдовица Наталия, иже по кончине родителей твоих, на воспитание прия тя, угодниче Божий, яко ты, святче Божий, от Господа Всемогущего мудростию и широкими познаниями с детства одарен был еси и любовью

к церкви Христовой озарен еси, в радости велией воспе о тебе Богу: Аллилуйя!

Икос 2

Разумом Божественным свыше просвещен бе святой блаженный Михаил Клопский, иже видя тя, прорече и святительство во граде сем, ты же, угодниче Христов, от юности житие богоугодное возлюбил еси и благочестивым наставником твоима внимающе, во страхе Божии, молитве возрастал еси; ко учению книжному усердно прилежал еси; и тако во трудех твоих, образ будущего жития твоего явил еси. Мы же, дивящееся таковому от юности твоея усердию, вопием ти сице:

Радуйся, ангелонравный человеце;

Радуйся, подвигов источниче неоскудный;

Радуйся, светильниче во тьме сияющий;

Радуйся, лампадо Божественнаго света;

Радуйся, водительству Духа Святаго издетска прилежавый;

Радуйся, веру твою делами любви утвердивый;

Радуйся, яко Самому Христу всякому человеку послуживый;

Радуйся, подвиги твоими Отцу Небесному угодивый;

Радуйся, святителю Ионо, теплый мелитвенниче о душах наших!

Кондак 3

Силою и благодатию Духа Святаго движимый, хранимый и озаряемый, прехвальный Ионо, в духе Евангельских заповедей воспитав свою душу, от юности явился еси делателем неленостным на ниве Христовой, все упование на Единого Бога возложив, от силы в силу восходил еси, богмудре по лестнице добродетелей христоугодных. Тем же просим тя: благомоощным предстательством твоим нас от козней лукаваго сохрани, да непреткновенно возможем пройти путь жития нашего, в исполнении заповедей Божиих и сподобимся купно с тобою выну, Господеви воспевати: Аллилуйя!

Икос 3

Имуще в сердце твоём веру твердую, надежду несумненную, любовь истинную к Распятому за ны Христу Богу нашему, разумея, яко «прилепятся Богови благо есть» потщился еси всех видимых благ отрицатися, во еже совершенным учеником Господа нарицатися, удалился еси жития мирского и суеты земной и пострижение монашеское прияти сподобился еси. Тем же и мы, зрящее духовное восхождение твое от силы в силу, тако с благоговением взываем ти:

Радуйся, вся красная мира сего презревший;

Радуйся, всецело попечению Божию ся предавый;
Радуйся, мир и чистоту в сердце твоём водворивый;
Радуйся, обетом девства чистоту сердца твоего явивый;
Радуйся, обетом нестяжания высоту духа твоего показавый;
Радуйся, обетом послушания Богу и ближним добре послуживый;
Радуйся, в вере и благочестии нас утверждающий;
Радуйся, всех нас к подвигу духовному призывающий;
Радуйся, святителю Ионо, тёплый молитвенниче о душах наших!

Кондак 4

Буря скорбей и напастей злобою мира сего воздвигаемая, не ослаби крепкия любви твоея, яже к Богу, отче праведный, вся бо с верою и надеждою претерпел еси, в Бозе токмо отраду и утешение обретая. Мы же ныне просим тя: сподоби и ны в сокровенных храмах сердец вознигнути духовныя престолы Спасителю, муки и смерть за ны претепевшему, и да сподобимся с тобою купно Милоседному Господу во веки воспевати: Аллилуйя!

Икос 4

Слышавше ближняя и дальняя о тебе,
всеблаженне Ионо, яко добротою души твоея к
людem просиял еси, всего себе на служение
христианом православным отдал еси.

Благочестивии же людие, видяще в тебе добраго
пастыря и учителя, с радостию притекаху к тебе
и велие утешение и ослабу в скорбех своих по
молитве твоей приимаху. Мы же, прославляя
Господа, давшаго ти таковую благодать,
приносим тебе сицевая:

Радуйся, прежде всего царствия Небесного
искавый;

Радуйся, благодатную силу смирения познавый;

Радуйся, яко талант, данный тебе Богом,
умножил еси;

Радуйся, яко в радость Господа Твоего вшел
еси;

Радуйся, мир Христов наитием Духа Святого
получивый;

Радуйся, сан священства, яко дар Божий,
приявый;

Радуйся, жертву бескровную со страхом и
трепетом совершавый;

Радуйся, словом мудрым всех приходивших к
тебе питаый;

Радуйся, святителю Ионе, теплый молитвенниче
о душах наших!

Кондак 5

Боготечной звезде яве уподобися богомудре Ионо, яко трудов твоих ради многих, воздаяние от Господа приим, угодниче: благодатных дарований прозорливости и источник чудес явился еси, недуги душевныя и телесныя отгоняти. Не лиши и нас твоя молитвенныя помощи, любовью тя почитающих и воспевающих Дивному во святых Господу: Аллилуиа.

Икос 5

Видеша тя братия, святой Ионо, яко воистинну сосуд избранный Божия благодати, егда чин ангельский восприяв, подвигов твоих не оставил еси, отче преподобне, но многообразными деяньми плоть твою усмирят, в молитвах и трудех преуспевал еси. Уразумеша сия убо насельницы Отней обители умолиша тя начальство над нима восприятии. Ты бо не устрашился еси великаго бремене правления, но во всем образ добрыя жизни подавая, наставлял еси братию подвигом иноческим. Сего ради восписуем ти похвалу сицевую:

Радуйся, древним подвижником усердный подражателю;

Радуйся, небрегущих о спасении душевнем строгий обличителю;

Радуйся, хотящим твоему непорочному житию

последовати укрепителю;

Радуйся, благодатными дарами изобильно преисполненный;

Радуйся, всесветлым храмом благодати Божия себе показавый.

Радуйся, орле небопарный, крилами Богомыслия возлетевый зрети немерцающую светлость

Солнца Правды, Иисуса Христа;

Радуйся, молитвам нашим, аще и немощным, с любовью внемлющий;

Радуйся, во всяких нуждах призывающим тя скорый помощниче;

Радуйся, святителю Ионе, теплый молитвенниче о душах наших!

Кондак 6

Проповедниче православныя веры и истиннаго жития во Христе Иисусе явился, преславный отче Ионо, Церковь на земли созидаючи. В ней бо древо Жизни святыи Жертвенник примирения, жизнь верным источает. Церковь бо суть духовная лечебница, радость радующихся, утешение унывающих. Темже многих обратил еси ко Христу Жизнодавцу, поя благодарственно Ему: Аллилуиа.

Икос 6

Возсиял яко “свеща на свещнице”, созидая тело Христово, строго соблюдая, дабы “едино тело,

един дух” чрез Таинства Церкви в храмах были
все. Храм бо возведение дольнего в горняя,
земная в небесная. Сему ревнуя, всехвальне, не
только храмы внешния, но паче храмы
внутренния, храмы душ Богу уготовляя еси.
Сему радуяся, воспеваем ти, сицевая:
Радуяся, приемший от Бога благодать скорби и
болезни в радость претворяти;
Радуяся, любовьию жестоких врагов в кротких
агнцев обращавший;
Радуяся, плач пред Богом и умиление блаженное
обретший;
Радуяся, кротостию и смирением Христу
Спасителю уподобившийся;
Радуяся, смирением своим высокая, нищетою
же богатая явивший;
Радуяся, дела твоя хриstopодражательная всем
зрящим показавший;
Радуяся, от грехопадений наших, имже несть
числа, избавляющий;
Радуяся, миром и любовью к добру души наша
снабдевающий;
Радуяся, святителю Ионе, теплый молитвенниче
о душах наших!

Кондак 7

Хотя отечества небеснаго достигнути, перстною
плотию обложен, дух твой молитвою воскриляя
еси, к Богу умом твоим восходя, горняя доброты

зрел еси славу, со всеми ангельскими силами поя Богу: Аллилуиа!

Икос 7

Новым трудом и подвигом усердно прилежал еси, всеславне Ионе, егда волю Творца и Бога нашего призван был еси на многотрудное служение архипастырское. Ты же, аки послушник трудолюбивый, пастве твоей смиренномудренно послужил еси. Тако, и ныне, во обителех Небесных пребываяй, наставник неусыпный буди нам, на тя надеющимся и глаголящим из глубины сердечныя:

Радуйся, апостолов и святителей достойный приемниче;

Радуйся, обильно в хиротонии благословение небесное стяжавый;

Радуйся, путей покаяния и спасения мудрый сказателю!

Радуйся, усыпленных совестей возбудителю!

Радуйся, благих помыслов насадителю!

Радуйся, сердца наша огнем Божественныя ревности воспаменяющий;

Радуйся, молитве сердечней нас научающий!

Радуйся, на славославие Божие всех созывающий;

Радуйся, святителю Ионо, теплый молитвенниче о душах наших!

Кондак 8

Странствие благоуспешное из Новгорода во град первопрестольный Москву совершил еси, прехвальне Ионо, егда великаго князя Василия убедил еси кроткими словесы твоима супротив отчизны твоея не ратоборствовати, сице евангельское обетование о миротворцех приял от Всемилосерднаго Бога, и в лице сынов Его вчинен был еси, сего ради просим тя, святыи Ионо, миром и благостию наполни души наша, да исполнившись благодати Божия, язвы греховныя врачующия, купно с тобою воспоим Отцу Небесному: Аллилуйя!

Икос 8

Весь светом небесной любви пламенел еси, преславне святителю; слова бо твоя беша, яко молния, ереси пополюющая, души верных пламенем веры и любви просвещающая; даждь убо и нам, отче молитвами твоима, искру хотя малую твоя любви имети, зовущим сицевая:
Радуйся, блаженство милостивых по обетованию Божию получивый;
Радуйся, милосердие в сердцах наших пробуждающий;
Радуйся, сострадати страждущим нас научающий;
Радуйся, друг друга тяготы носить нас подвизающий;

Радуйся, страстьми одержимых от гибели спасающий;
Радуйся, труды наша на пути спасения облегчающий;
Радуйся, вражды и ссоры наша умиротворяющий;
Радуйся, всякий мрак заблуждения от нас прогоняющий;
Радуйся, святителю Ионо, теплый молитвенниче о душах наших!

Кондак 9

Всякия беды, скорби и напасти избавляеши нас, пречудный святителю Ионо, твоими теплыми к Богу молитвами; сего же ради, мы грешныя, к представительству твоему прибегая, молим тя, отче святыи, испроси нам вся ко временной и вечной жизни полезная, да сподобимся Горняго Иерусалима достигнути и купно с тобою Господеви воспевати: Аллилуйя!

Икос 9

Вития многовещанныя не возмогут по достоянию восхвалити тя, святителю Ионе, и воспети святость жития твоего и молитвенные подвиги, деннонощныя труды и попечения, спасения ради, пасомых подъятыя, кротость и незлобие твое, верный служителю Христов, ты бо просвещал еси светом истины Евангельския

люди земли Росийския и наставляя еси я их на путь спасения; темже молим тя: не остави нас в суете мира сего погибающих, просвети омраченныя грехом сердца наша и к жизни Небесней направи и прими сия малыя и нехитростныя похвалы:

Радуйся, богомудрых святителей высокая похвало;

Радуйся, преподобных и праведных всечестная славо;

Радуйся, монашествующих похвало и утверждение;

Радуйся, мирян в благочестивом житии укрепление;

Радуйся, нечестивых и душетленных обычаев неуклонный искоренителю;

Радуйся, кротких и благих нравов благоискусный насадителю;

Радуйся, сердец смятенных умирителю;

Радуйся, от озлобления на нас враждующих хранителю;

Радуйся, святителю Ионе, теплый молитвенниче о душах наших!

Кондак 10

Спасения всех желая, святителю отче Ионе, во вся дни многотруднаго и прискорбнаго жития твоего многих людей, мирскими делы обремененных, утешал и укреплял еси, отраду

своим попечением подавая и тяготы трудов облечая. Сие убо поминающее просим тя, чудотворче святыи, моли о нас, чадах твоих духовных, да милостив будет Господь и к нам, грешным, да облагодатит и нас ходатайством твоим, вопиющих Ему о тебе: Аллилуиа!

Икос 10

Стену несокрушимую и утверждение непреоборимое обретоша тя, богоносне святителю Ионо, яко ты по кончине твоей праведней востекл еси в чертоги Отца Нашего Небеснаго, идеже во славе невечерней предстоиши Ему купно со всеми святыма в земли российстей просиявшима и милость Его преклоняеши ко всем, с верою и любовию вопиющих, ти сице:

Радуйся, житие твое земное благочестно скончавый;

Радуйся, от небеснаго Царя венец славы получивый;

Радуйся, озаривый вселенную светом добродетелей твоих;

Радуйся, яко видя добрыя дела твоя, человецы Отца небеснаго прославляют;

Радуйся, яко тобою от всех зол избавляемся;

Радуйся, яко твоими молитвами ревности в вере исполняемся;

Радуйся, яко тобою истина утверждается;

Радуйся, яко тобою лицеприятие и
человекоугодие посрамляется;
Радуйся, святителю Ионо, теплый молитвенниче
о душах наших!

Кондак 11

Пение благодарственное Пресвятей Троице
принесоша людие новгородския, егда обретоша
честные и многоцелебные мощи твои, святителю
Ионо, аки спасительный источник, дивные
чудеса содевающий, и поставиши их в церкви
соборней, поя богу: Аллилуиа!

Икос 11

Светозарное светило, зарями немерцающего
света Пресвятая Троицы сияющее, всей
Российстей стране явился еси, отче наш Ионо,
ты бо, яко облак светел и росоносен явился еси,
пламень праведно движимаго на ны за грехи
наша гнева небеснаго утишаеши и зной
страстей душевных и телесных охлаждаеши,
иссохшия сердца наша оживляеши и плоды
добродетелей приносить помогаеши всем
воспевающим ти таковая:

Радуйся, радости духовныя, тишины же и мира
источниче неисчерпаемый;

Радуйся, светлый облаче, зной страстей
греховных утоляющий;

Радуйся, росо благодатная, сердца верных

орошающая и веселящая;
Радуйся, светом добродетелей в нощи мира сего
нам присно сияющий;
Радуйся, благодатно от Духа Всесвятаго
питающий нас и веселящий;
Радуйся, грешников к совершенному покаянию
побуждающий;
Радуйся, ран греховных врачу
благоискуснейший;
Радуйся, сиянием благодати Божия души наша
озаряющий.
Радуйся, святителю Ионо, теплый молитвенниче
о душах наших!

Кондак 12

Благодать Духа Всесвятаго стяжал еси в житии
твоем за любовь к Отцу Небесному и ближним
своим; веруем, яко и по смерти благодать сия
пребывает с тобою, чудотворче святой Ионо
прехвальне; сего ради и молим тя: испроси у
Господа Сии, да сохранит Церковь
Православную от неверия и расколов, избавит
от всяких бед и напастей, вопиющих Ему:
Аллилуйя!

Икос 12

Поющее твое прославление в лице святых
Церкви Православныя хвалим, славим и
ублажаем тя любовью, пречудный святителю

Ионе, яко заступника и молитвенника о нас пред Господом. Ты же дарованною ти благодатью, просвети омраченныя грехом умы и сердца наша, настави нас на путь спасения, утоли скорби наши земныя и радости духовной нас исполни. Ты бо светом благодати твояе нас озаряеши, сердца наша увеселяеши нас пети ти сице:

Радуйся, яко тобою ум наш в богомыслии научается;

Радуйся, яко тобою мрак неведения прогоняется;

Радуйся, из пучин отчаяния нас извлекающий;

Радуйся, светом надежды нас озаряющий;

Радуйся, от плевел ненависти сердца наша очищающий;

Радуйся, заповеди Евангельския исполняти нас научающий;

Радуйся, от путей погибельных нас удаляющий;

Радуйся, милосердие Божие к нам приклоняющий;

Радуйся, святителю Ионо, теплый молитвенниче о душах наших!

Кондак 13

О преславный святителю, отче наш Ионо, теплотою любве твояе ко Господу, посети и согрей души наша и прими убогое сие приношение наше, яко венец похвалы

сердечныя и, яко, фимиам благовонный,
вознеси молитву твою Отцу всех и Владыце и
испроси земли нашей – мира благодетельнаго;
Церквам Божиим – единства и благосостояния;
нам же всем – чистоты сердечныя и любви
непорочныя, да тобою охраняемы и спасаемы,
Господеви вопием: Аллилуйя!

Сей Кондак читается трижды; затем паки Икос
1 и Кондак 1

